

1 Pita

¹ Nai Pita, Jesus Kristus san aposel. Anj tamolpein Anut ipilianan go ananem panu fun abi-seig aug, Pontas na, Galesia, Kapadosia, Esia agod Bitinia na, aben a luluḡad lo tamol gol ak igo won amado dan, anṡsam na girek en ḡgire da. ² Bai Anut gubak mi an gamugo alasa yan san saen lo ilian ilon go ipilianan an lo Awan Urgun inṡsan urat lo an inanen tamolpein gun ak alasa ya. Agog an inanen tamolpein awa bek san ago mi amado ator a, agod Jesus Kristus inanen dar ikulmaek an lo anṡsam aupasek isuas panan a.

Anut inṡsan ilo panek, agod inṡsan ilo maror ipanan pe ilom lo italbusip tubun ilasa wan o ḡgudani da.

Id kumaen foun ak tile wa

³ Id Bai Anut, idsad Tubun en Jesus Kristus san Taman per tupani da. Man dugo, inṡsan ilo muḡanek tubun an lo, id ibol nanuk foun ak on tilasa ya. Ago yan lo id Anut tile san ninen o patud isa wa, agod tini ganei en ibol mel kumaen imat san tia yak igo won tabi sakar da. Mel en Jesus Kristus materḡ lo kumaen imasa yan lo ilasa ya.

⁴ Id nanuk foun tilasa yan lo Anut san mel uyan uyan ak lak na yen dan, inṡ ipilianad pe murna gup an fidian tinane wa. Melmel en ta idafur na wa, tamolpein sad aupasek iganep melmel an nun dilasa san tia ya, agod an sad leil siḡaokan an ta saian na wa. Melmel en murna san an Anut kumaen panu na an ninemi wo kagin ipani da. ⁵ Anj

ilom rumok ak lo, Anut san dabai an dumui on ibargiranan da, an lo patu pasek a saen wadan lo Anut iganep ilasa wan ale wa. Patu pasek an Anut ikubune lag yen da, ago yaup saen wadan a Anut ipate yan lo kuai isi wa. ⁶ Ak man gamu saen katukan en lo muruan sensen ak ale da, ago bo man arut amoi. Tia, uyam isusa wa, ⁷ man dugo, muruan asini dan lo fidian dile wak ananem ilo rumok Jesus Kristus lo yan rumok a. Anut malan lo ananem ilo rumok an sijaokan mok a, agod an gol san naon irinani da. Rumok, gol san naon an tubun kasik bo man, dibitinae san ninen yai lo diganep dumari dop, sijsak dupasip an lo inanen naon yaup lak na mok a. Ago bo man, murnap gol in tan en da itout yau a. Nek ago mi, Anut ananem ilo rumok ibitinae o ilian funan dugo muruan ale ya, bitinaek an lo Jesus Kristus kuai isi san saen lo an per, girager, agod yanjak tubun ak anane wa. ⁸ An in ta ale na ya, gug in ninen o amat da. Gamu dam an in ale san tia bo man, in o ilom lo rumok a. Agod an yousai anda mi ananefute da, an lo dop ananem ilo uyan an tubun kasik an lo ninen ta aninjen san tia ya. ⁹ Agod ananem ilo rumok san nunon man ansam nutumi Anut injiliai pe sasau lo idirai a.

¹⁰ Profet adi saen ilo panek a Anut ipanan an ninen dubol ilasa dan lo, patu pasek en san fun dile wo aban an diabi sijaokan da. ¹¹ Saen Kristus san Ur in ilod lo imado dan Kristus san madai agod insan yanjak tubun ak mitep inane wan ikubiai pidinai dan, in Anut dusumiani ak, mel dugon boi, tia, nal dugon boi, ninen o Urgun ininjen da. ¹² Gug in mel a dininjen ilasa dan sed ibinawai san o ta

diñineñ da, tia, an o dubol ilasa dan Anut ikubiai pidinaí a. Melmel an san ñineñ an alon la ya. Dugo won ak i? Bilaluñ tamol an Urgan kumaen panu na Anut igane idu yan san dabai lo inñsan ru uyanan an dufulale anñsam na ilasa ya. Eñel adi dam maladi lo melmel an san fun dile wo dumat geig da.

Gun amado

¹³ Ago yak niñen o kabunam akubune uyanan pe urat niñen o tawan agane dop, sem ulum am abi uyanan dop, ilo panek san binawek a saen Jesus Kristus kuai isip anñsam na ipalu wan mi tinim agane pani wa. ¹⁴ An imug anjaon dugo amado se ya, ago dugo kagin naok naok a ilo masa igane ilasa se yan ari na ya, gug gamu nek ibol nanuk awa bek san igo won, an kagin an fon mi ta atutuñani na wa. ¹⁵ Tia, nek ibol In a an igian an inñsen gun imado dak igo won, anñsem dam sam urat fidian lo gun amado wa. ¹⁶ Man dugo, Anut san girek ago ibol a, “Ñai gun ak niñen o, an dam gun amado.”

¹⁷ Agod Anut a titiñae tamol igo won tamolpein kisaek kisaek sad urat bitinaek lo idiri dan niñen o an Bai abol tap, an saen tan en lo amado dan, ibol tamolpein asau ak igo won arer dop anñsam madok an kagin apani uyanan a. ¹⁸ An alon ak, Anut an tubumi sad kagin nunon tia man dupanan an lo idad go ipasan inñlian a. Mel ta itout yau san ibol silva gol da igo won ak lo an ta idad go inñlian na ya. ¹⁹ Tia, Kristus man ibol sipsip nanun nun aman tia, agod baob aman dam tia yak igo won, inñsan dar naon lak na geig ak lo ipasan go inñlian

a. ²⁰ Tan en gamugo ilasa dugo Anut In ipiliani a, gug gamu saen en san wadan lo an ninemi wo Anut igane walal te ilasag ale ya. ²¹ Kristus lo an fun aganeg Anut a in matej lo ifufunig kumaen yabisag yanak tubun ak ipani an ilom lo rumok a, ago yan lo gamu anjanem ilo rumok agod anjanem tini ganei dam diaug Anut lo dututou da.

²² An ru rumok ari apani na yan lo an gamu ntuami adiraig gun dilasag, an lo anjanem Kris teim taom ninedi wo amat dan, an mi nunon a. Amaiak ninen o an ilom ntuam rumok amam da nug ninen o amat a. ²³ Man dugo, ai patun kitekan yen pe itout yau san an lo an foun ak igo won ta alasa na ya. Tia, ai patun a itout yau san tia yan lo tamolpein foun ak alasa ya. Ai patun an man Anut san ru kumaen ak, agod pempem yen yau san an mi a. ²⁴ Man dugo, Anut san girek ago ibol, “Tamolpein tinidi man ibol gafurfur on a, agod injsad damag fidian an ibol boban on a. Gafurfur igos idu da, agod injsan bob dam diau dudu da.

²⁵ Gug Tubun en san ru man pempem yen yau da.” Ru nek an man bilalun uyanan ak anjam na dufulale dugo alon a.

2

¹ Amaiak ninen o an ale saian san kagin fidian, rawek fidian, balek uraru san kagin, mala sek san tinjae saian, agod uf ru a fidian bubem lo ale dan, anjanep abiliau a. ² An ibol nanuk foun ak igo won, su ta dukubuli na yan Urgun ipanaj an aluk o amat geig a. An ago agane dop man ka atalbusi dop an lo sasau a Anut ipanad an anjane wa. ³ Man

dugo, an Tubun en san bulbal akubianig ale alon la ya, in mi uyanan mok a.

Pat kumaen yen dak san nihen

⁴ Insen mi pat kumaen yen da. Ago dugo tamolpein in diabiani ak gug Anut in ipiliani a, agod in malan lo pat an naon lak na geig a. An naon na au dan, ⁵ an dam pat kumaen yen san ago mi Anut itumanan dop insan nutun san ab on isuse da. An lo an pris adi gun ak on alasa ya. Nek ibol pris wagam ak Anut yai dutuni pani na yak igo won, an dam yai atuni pani da. Gug kulob an man tan en san yai tunek tia, tia, an nutum san yai tunek mi a, agod Kristus lo Anut in uyan ipanan da. ⁶ Ru girek lo ago ibol,

“Ale, nai pat ta Saion na nuguni a.

Sukurun yabituani san pat an pilianek la ya,
agod naon lak na geig a,
agod tamolpein in o ilod rumok dan,
miai ta ifu na wa.”

⁷ An tamolpein ilom lo rumok dan ansam leil lo pat en naon lak na geig a. Gug aenkadi ilo rumok amad tia yan insad leil lo,

“Pat a ab susek tamol dibiti an murnag ab sukurun isinig itur a.”

⁸ Agod afon,

“Pat an igane dop tamolpein ate nied dusue dak,
agod igane dop ate diau dudu da.”

Man dugo, in Anut awan ta diri na da, an lo diau dudu da. In ago digane san Anut ipilianai a.

⁹ Gug an man Anut san tamolpein insen ipilianan a. An man Kin san pris adi, tamolpein gun ak sad midaen, agod Anut in muroun a. Ansam

urat man, in a an igian go tidom tubun an abiseig, in san lilaman sinjakaan ak lo aladu yan lo, in anen bunun uyanan an ninen abol ilasa wo ago igane ya. ¹⁰ Imug na man an tamolpein warou kisaek tia ya. Gug gamu an Anut san tamolpein alasag amado da. Imug an in san ilo munjanek ta anane na ya. Gug gamu an in san ilo munjanek anane ya.

¹¹ O turag muroug, an man ibol tamolpein panu sen ak san apalug tan en lo tamol gol ak on amado da. Amaiak ninen o, naj nususunan pe tinim san ilo masa ari apani wo amoi a. Man dugo, kagin saiak an njutum san ager imado da. ¹² An gob adi luluad lo ananem nao lalek pempem uyan an mi yen a. Gidad gamu an agane saian dak dubol a. Gug saen Anut idsad na ipalu wan te gup an sam kagin naok naok a dile la yan ninen o Anut yan an diabisa dop per dupani wa.

Gurman paed na amado

¹³ Tubun en yan an o tan en san gurman fidian paed na amado. Rom san kin in malan te yak ago abol a, agod paen na amado wa. ¹⁴ Agod gabman gurman dam paed na amado wa, man dugo, Anut in ipilianai man tamolpein a dugo digane saian dan bu dupidinai san urat digane da, ago dop a digane uyan dan in uyan dupidinai san urat dam digane da. ¹⁵ Man dugo, Anut san ilo ibol igo ya, an uyan agane dan lo tamol burau ak sad ru nin eo dubol dan sad awad afutani da. ¹⁶ Tamol in sen kisaek imado dak igo won, an ago amado wa. Ak gug, an lo amianuk dop kagin saiak saiak ta agane na wa. Tia, nek Anut san urat tamol mok igo amado wa. ¹⁷ Tamolpein fidian yan ad asini wak,

teim taom Kris adi niñedi wo dam amat a. Anut niñen o arer dop, Rom san kiñ dam yañan abisa wa.

¹⁸ Anj bigabeg man añanem titianek paed na mok, tok abol amado wa. Titianek tamol uyadi a kagin dupanañ dan lo ago agane wa, a muruan dupanañ dan lo dam nek ago mi agane wa. ¹⁹ Man dugo, tamol ta san kankan Anut lo yen dop, an lo madai muruan da isini san tia yak isini tap man, mel sinjaokan geig a. ²⁰ Ak man oñ gane saian ak san bu ñane dop lo utur sakar tap, an naon Anut dugo ipitiano wak i? Gug oñ uyan gane yak lo madai ule dop lo utur sakar tap man, Anut malan lo an ipitiano san mel igo woñ a. ²¹ Anut ago wo añ igian a. Man dugo rumok, Kristus inñen añ abemi lo muruan isini a. Saen tan ibisei an lo inñsan kagin naok naok man mitilaen igo woñ ibisei panad an lo tile dop ñien aban turi wa.

²² “Inj aupasek ta kisaek igane man tia ya.

Agod awan lo ru sewak ta ilasa man dam tia ya.”

²³ Saen tamolpein inñ dimisilani se man inñ ru naon ta ipidai na ya. Saen inñ madai dupani an inñ naon igane wo ta ibol na ya. Tia, inñsen Tamol a san bitinaek itaot mok an banin lo igane ya. ²⁴ Kristus inñsen tinin nam aigim fo idsad aupasek fidian isini a. Ago dop an lo id aupasek san dabai lo ipasad pe, idsad madok lo itaot tumado wa. Inñ tinin dufunig ikafut idiri an lo ikubinian a. ²⁵ Man dugo, añ ibol sipsip dal diñaon ak oñ adeg au a. Ak man gamu añanem Titianek san na amul apalu ya. Inñ mi anñsam Kagin Panek Tamol.

3

Nug iwon iwon sad ru

¹ Nek imug bigabeg inaned gurman paed na dumado se ago mi, an pein dam iwom paed na amado wa. Aria, dal an lo aenkadi Anut san ru ta duri na tap, iwodi sad kagin naok naok an dile dop ate ilod dirjane dop ilod dibileksa wa. An man ilo naneke san ru ta pein awad lo ta ilasa na ya.

² Man dugo, an Anut ninen o arer dop anjam kagin gun ak lo amado dan in dile wa. ³ An tinim san damag patun fo yak asinip nam tinim bala apani wo kankan tubun mi ta agane na wa. Dar diturje idu, kululoi naon tutubun agod bioun sinjakaan adiri dan an mel kawan a. ⁴ Tia, anjam bala man kagin dugon an ilom lo yen dan an mi a. An ilom man mosan, agod dagoman a. Bala naok ago yak man itout yau san tia ya, agod Anut malan lo an man naon lak na geig a. ⁵ Man dugo, wagam dal kisaek an lo mi pein gun ak Anut tinid dupanig dumado se yan insed damag ipidinai sinjakaan a. Ago dugo iwodi awad paen na mok dumado na ya.

⁶ Nek ago mi Sara dam Abraham awan paen na imado dop ninen o inanen tubun ak ibol se ya. An uyan agane dop mel ta urer ipana an san ninen o ta arer na tap, an insan nanun muroun alasa wa.

⁷ Nek dal kisaek ago mi, an tamol iwom da sisem amado dan, pein in dabai tubun amad tia alon an ninen o yanadi abisa fufei wa. Man dugo, an sisem Anut san ilo munaneke lo kumaen anjane wa. An ago agane tap, anjam gudanek an kawan tia ya.

Melmel uyan ak san madai anjane wa

⁸ Naineḡ ru kagin wadan igo ya. Anḡ fidian kankan kisaek, agod nug ilon imuḡani wa. Nug tein taon igo woḡ nug niḡen o amat a. Nug niḡen o bubem apasi wak, sem ibiaḡ adu dop aenta diriḡanaḡ ak ago ilom isou wa. ⁹ Ta digiḡiaḡ saian tap, naon dam ta agiḡiai saian na wa. Ru saian nam dupaiḡ tap, naon dam ta amisilanai na wa. Tia, an naon Anut bar uyan ak ipidiḡai o agudani wa. Man dugo, Anut ago wo anḡ igiḡiaḡ a. Agop an lo, bar uyan ak ka ipanaḡ a. ¹⁰ Man dugo, Anut san ru ago ibol a,

“Talpein ta madok uyan ak lo imado wo imat,

agod melmel uyan ak ile wo imat tap,

ru saian ta ibol na wa,

agod awan lo dam ru rawek ak ta ilasa na wa.

¹¹ Kagin saiak patun ipanip kagin uyan ak mi igane wa.

Maror san dal o abaḡ yabi dop an ile wo yaes isofutani wa.

¹² Man dugo, Tubun en malan yaug tamol itaot ak yil pasai da,

agod iḡsad gudanek lo pempem kududon igure da.

Gug tamolpein a saian digane dan niḡen o naon ikafut pidiḡai da.”

¹³ Aria, anḡ kagin uyan ak agane wo yaes isofutananaḡ dop, enti maeg iganep saian ipanaḡ ak i? Tia geig a. ¹⁴ Gug kagin itaot ak agane san o madai asini dan an rumok tap, gidad, anḡ man bar ḡanek tamolpein mok a. A muruan dupanaḡ dan niḡedi wo ta arer dop ilom ta muruan na wa. ¹⁵ Tia, nek anḡ bubem lo Kristus aganep anḡsam Tubun ak oḡ ale wa. Ananem ilo rumok niḡen o kankan

aņane fufei dop man, talpein aņanem tini ganei Kristus lo yak a ilom lo yen dan san fun afulale wo isumianaņ tap, ru ilo safulalek san ka apani wa. Gug pasak na mi agod urer amam da ago agane wa. ¹⁶ Aņanem kagin naok naok atitiani uyan dop man aņanem kankan muruan ta ipanaņ na wa. An lo dop tamolpein a aņ kagin uyan uyan Kristus lo agane san niņen o dipirgini dop dimisilanaņ dan miai ifunai a. ¹⁷ Man dugo, Anut ilon ibol tap aņ kagin uyan ak niņen o madai asini san man uyan a. Kabelan saian agane san niņen o muruan ale banau. ¹⁸ Man dugo rumok, Kristus inșen saen kisaek o lian aupasek niņen o mateņ ile ya. In man tamol itaot ak igo woņ aņ tamolpein ta itaot na yan aņsam abem inșane ya, an lo aņ inșianaņ pe Anut san na au a. Tinin tan san en lo dufuni imat a, gug ŋutun lo Anut iganeg kumaen ilasa ya. ¹⁹ Ago dugo ŋutun yaug wagam san tamolpein a ŋutudi subanek lo dumado se yan naod na ru ifulale ya. ²⁰ Tamolpein an wagam Anut awan diparsisali se ya. An Noa san saen lo Anut ka yil fu oņ dugo yaug Noa wog tubun ak ifoug urat itout a. Nal an lo tamolpein wei tia, 8 mi, wog an ilon lo inșal go, lom tubun ak san you lo patud ipasi a. ²¹ You an man Kris fulanek san mitilaen igo woņ a. Man dugo, gamu fulanek san you an id patud ipasig tumado da. Fulanek an tinid sad nun ta ifulani yau na da. Tia, fulanek tile dan lo Anut tusumiani dak id ilod ikubunep kankan uyan ak ipanad a. Fulanek an nek Jesus Kristus mateņ lo kumaen imasa yan lo mi dabai inșaneg an lo id patud ipasi da. ²² In kumaen panu na isidag Anut giranaņ won ak lo imado dugo eņel adi, ur sensen sad gurman adi,

agod mel dugon dabai amad da atna dumado dan,
an fidian paen na dumado da.

4

Anut san ilobol paen na tumado da

¹ Ago yak ninen o, Kristus tinin tan en san lo madai isini ak ninen o, an dam ilo isou kisaek an mi abi sakar a. Dal an lo madai asini san ninen o an sem dabai ipanañ a, man dugo, talpein enti tinin sen nam madai isini tap, aupasek san kagin an ibisei a. ² Ago yak ninen o inñsan madok tan en lo tamolpein sad ilobol an iri san ilon ta yen na da. Tia, Anut san ilobol an mi iri ipani wo ilon yen da. ³ Inug an saen tubun mi gob adi sad kagin diri wo dumat an an dam ago agane na ya. Agod an kagin an arig yaug idaisida ya. An se pitianoñ kagin, ilo masa san kagin, jeit kagin, soubul gidigheid lo, lukluk san nñtanat amado dugo, tubud sewak adi ubou ad tile san Anut geg igane yan ari apani se ya. ⁴ An gamu in luad asap kagin saiak saiak wei mi a digane dan lo dida asourubep, au o afon ta agane na dan ninen o durut saian geig a. An lo an dumisilanañ da. ⁵ Gug Anut mi in tamolpein a kumaen dumado dugo a dumat la yan bitinaek lo idirai san tawañ igane dan, naon na dutur dop in o ru naon dupani wa. ⁶ Nek fun amaiak ninen o Kristus in tamolpein dumat la yan sad na yaug bilalun uyan ak san ru ifulale dugo dulon a. An lo gidad, in tinidi tan en san lo tamol sad bitinaek dile ya, ago bo man in nñtud lo kumaen a Anut da yan, in dam kumaen an lo ka dumado wa.

⁷ Mel fidian itout yau san saen sumeik ipanad da. Ago yak ninen an kabunjam ipasti dop sem ulum am abi o uyanan a. Ago dop man ka agudani uyan a. ⁸ Mel malan te man ilom n̄tumi fidian nug ninen o amat a. Man dugo, nug ninen o amat dan san kagin aupasek wei mi imianai idu ya. ⁹ Nug kagin apani uyan dop, an o ta anurnur na wa. ¹⁰ Dabai dugo aenta abinawai san Anut an kisaek kisaek ipanaj an kagin apani wo uyanan a. Awa yabek tamolpein igo won Anut san ilo panek inanen dal kisaek kisaek atem urat apani wo uyanan a. ¹¹ Ta in ru ifulale san manau aman da tap, nek ibol Anut san ru mok mi ifulale dan igo ru ifulale wa. Ta in binawek urat igane tap, dabai a Anut ipani dan lo urat an igane wa. Ago dop urat fidian lo tamolpein ka Anut per dupani wa, an man Jesus Kristus lo mi a.

Oñ Kris ak ninen o muruan sini

¹² O turag muroug, an bitinaek wananan geig ale dugo amasa saian an mel naok foun ilasa yak igo abol banau. ¹³ Tia, youm isa wa, man dugo, an Kristus da sisem mi muruan asini da. An lo saen Kristus san girager kuai isi wan ate dop ilom uyanan geig a. ¹⁴ An Kristus yanjan ninen o saian dupanaj tap man an tamolpein Anut san bar anane ya, man dugo, Ur a Anut san agod girager san an an tinim lo yen da. ¹⁵ Kabelan ta an lulum lo tamol ifuni imat o boi, tia gumagam o boi, tia kagin saiak saiak funfun igane wo boi, tia, ninen o kabunan isou imug dop, mel naok an fidian ninedi wo madai isini banau. ¹⁶ Gug an Kris igo won muruan asini tap, miai ifunan amoi. Tia, an Anut

yaŋan abisa wa. Man dugo, in yaŋan aŋ tinim lo yen da. ¹⁷ Anut bitinaek igane san saen ipalu la ya. Agod fun iganeg, ilo rumok tamolpein adi malan malan ibitiniai da. Aria, id lo fun igane tap, tamolpein a Anut san bilaluŋ uyan ak ta diri na dan sad wadan an dugo woŋ ilasa wak i? ¹⁸ Agod afon, Anut san ru igo ibol,

“Tamol itaot ak patu pasek lo iladu san ta pasauman na yan rumok tap,
tamolpein a au dupas dan ago Anut san kagin in lo tia yan muruan dugo in sad na ilasa wak i?”

¹⁹ Amaiak niŋen o, ensauta in Anut san ilo ibol lo madai dile dan, sed idiraip Anut banin lo diau dop urat uyan ak mi digane yau a.

5

Gurman in pinein da sad ru kagin

¹ Nai matu gurman aŋ luluŋam lo dumado dan, nai dam nek in ago mi numado da. Nai dam Kristus madai isini an seg malag mok nam niŋe ya. Taida mi niŋaseg dam in san girager murnap kuai isi wan nai dam an lo numado da. An lo igo numumianaŋ o da.

² Aŋ Anut san sipsip atirnai o ipanaŋ an atitianai a. Gurman mok oŋ kagin apidinai a, aŋ talpein a dusou dudunaŋ dan niŋen o ago ta agane na wa, tia, an nek aŋanem ilobol lo mi a, nek ibol Anut aŋ o ilon yen dak ago mi a. Aŋ moni aŋane san o malam ta isi na da, ak man urat an agane wo bubem yen da. ³ Aŋ sipsip a Anut banim lo idirai an nai-nai kagin lo atirnai amoi. Gug aŋsam kagin an ibol mitilaen igo woŋ Anut san sipsip dile dop duri wa.

⁴ Agod saen sipsip titianek sad gurman ipalu dop,

girager san lilit gumuran ta itout yau dan anjanem urat naon on anjane wa.

⁵ Aria, an pinein dam tamol busumadi ak paed na amado wa. An fidian nug naon na sem ibian adu wa. Man dugo, Anut san ru ago ibol a,

“Tamol sed yanjad diabisa dan Anut naod yabi da.

Gug tamol sen yabi idu dan inisan ilo panek ipani da.”

⁶ Ago yak ninen o an sem ibian adu dop Anut tuon dabai an paen na aladu wa. An lo murnap saen mok fo in ka an ibiansa wa. ⁷ Anjanem ilo muruan fidian banin lo agane wa. Man dugo, in malan lo an mel tubun an lo in an kagin ipana da.

⁸ Malam ipuk pe tawan agane dop, sem ulum am abi uyanan a. Man dugo, anjanem ager Satan ibol laion imatigen ak ibob dugo tamol ta yani itout o aban isueg itor dak igo won a. ⁹ Ago yak ninen o an naon abi dop anjanem ilo rumok lo mi atur sakar a. Man dugo, an alon ak anjanem teim taomi tan titin fidian lo muruan naon kisaek anami disini da.

¹⁰ Agod Anut in mi ilo panek fidian san muroun, inisen Kristus lo igian go inisan aben a girager anda pempem yen on dan lo aladu wa. Saen katukan mi madai asini gup inisen mi ansam madok ikubunep lo atur sakar dop dabai ipana a. ¹¹ In mi dabai pempem yen yau on dan aman da ya. Rumok.

Ru wadan

¹² Nai girek katukan en Sailas ibinawag go ngire ya. In ninen o nai ilog rumok ak, in Kris tamol mok a. Girek en lo nai an tan suek ru nupana, agod ru e nrupaian den man Anut san ilo panek mok a. An lo atur sakar a.

¹³ Midaen Anut ipilianai go Babilon na dumado dan inşad ilo uyan ru anşam na digane ipalu ya. Njai nanug Mak dam ago igane ya. ¹⁴ Kris kagin lo nug banin abi wa.

An fidian Kristus da amado dan ilo maror an lo ka yen yau a.

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d